

Fasnacht 2014



KINSCHTLER
synt 2002

Hesch's gsee, miir hän e Frau derbyy,
he wäge dr Frauequote muess das syy.
Au fir sie sell sich s'Bänggle lohne,
drum griegt sie ai 12tel vo de Subventione.
**So e Saich, do kunnt mer s'Gruese,
s nägscht Joor bekunnsch Du e Goschdyymbuuse.**

Dä lauft wiene Wyyb, het Scheel in de Hoor,
und sone Laggaff wird Wältfuessballer vom Joor.
mit synere Friise het dr Ronaldo Stress,
genau glych, wie dr Gilbert Gress.
**An dr WM in Kathar Dir merkets au,
goht sogar däm syyni Friise zer Sau.**

Wo ych em Steinbrück zer Waal kondolier,
stemmt d Merkel scho s zwaiti groose Bier.
Die Skulptur, e Gschängg fir d Angela,
saluti Bella dini Silvio vom Italia.
**Noch em Beggibruch maint d Merkel droche,
die näggschte Wuche muess myy Alte koche.**

E rooti Nase e diggi Zunge,
und e gruusigs Pfiffe uff dr Lunge.
Bebbi denn waisch, muesch inhaliere,
denn dues mit ere E-Zigi brobiere.
**Zur Verseenig mit dr Schwyz kauft, s isch z begriffe,
dr Steinbrück au soone elektrischi Friedenspfyffe.**

Wo ych vom Hitzfäld e Portrait ha derfe moole,
saag Othmar wenn kasch dr Schwyzerbass abhoole?
Scho glyy, wenn mi die Beamte nit versooole,
ych mecht nit als Schwoob z Brasilie dr Dittel hoole.
**Nach dr WM isch Schluss. Mee Zyt fir d Frau due ych druss schliesse,
nur är will, Samba, Samba und Bunga Bunga in Rio gniesse.**

S macht dä Mörgeli de Ziircher Söörgeli,
will ins Museum zugg umsverwöörgeli.
D Bildigsdiräggtorin Aeppli suecht e Schnäppli,
schaad läbt är nimme unsere HD Läppli.
**Kennt ebber dr Underschiid zwischo Mörgeli und Läppli?
Nit? Dr Läppli het dr Tschumpel nur gspielt!**

Die Kaffiwäärbig mit em George Clooney,
het schyyns e Doubel gmacht, jä Si do stuun i.
E Double dien mir uns schängge,
und Pointe kasch dir sälber dängge.
**Isch d Pointe guet, dass isch dr Raiz,
griegsch e Kaffi gschängt, do in dääre Baiz.**

Dr Obama maint bi däm Huushaltsstritt,
he Rebuplikaner: so nit, das got mer zwitt.
Das Gschyss ych kas nit verstoo,
bi miir de Haim ischs au esoo!
**Barack muesch nid druurig sy,
kumm schnäll zu miir und wandere yy.**

Kinschtler hets gnue uff däm Planet,
nur vo uns Drei isch iberhaupt nit d Reed.
Aber Lääbeskinschtler hets Ain fallt uns y,
he, Du kennsch ihn au dr Morin Guy.
**Im Roothuus sait Ain nach vyyle Stunde,
ych haa ihn gsuecht, aber noonni gfunde.**

Ych wird vom Papst im Vatikan empfange,
dr Millione-Bischoff isch grad gange.
Sag Franziskus: kennt ych d Weiig griege?
denn ka au ych emool «First Class» fliege!
**Wohnt doch dr Kinschtler und syni Frau,
uff aimool au in Wollerau.**

E Richter het e Junki schnippisch befroggt,
und ihm 1, 2, d Wooret grad entloggt.
Hösch Alte, bi nur an dr Noodle ghange,
wil ych gstriggt ha fir soone Fäaristange!
**Und verlierst e Masch, denn mach kai Gschrey
s'isch eh e Fall für d'NSA.**

An dr Kunschtmäss haut mi Aine a,
«hey du Mann wievyyl fir Bild muesch ha».
4 Millione, stuun ych was do lauft,
dä zahlt und het myy Buechzaiche kauft!
**Sit dert duet är nimme sälber moole,
mit Chinaramsch verdient är jetzt d Kohle.**

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Fasnacht 2014

D'Schnaps bagge

Als Regierigschef in Franggrich, do hesch's im Lääbe nit schwer

«Du Vin rouge, des petits fours - La vie est belle et laisser faire.»

In dr EU bringsch ene dr Schmuus und politisiere tuesch mit allne Mätzli

und egal, wie doof de ussesch - de grieg'sch immer die diggschte Kätzli.

Politisch vielleicht inkorrägg't – aber zu däm Schlag Mensche han i kai Vertraue,

I main die Type, wo de alte Fraue geehn go Handtäschli klaue.

Die selle doch Sache stähle, wo kain vermisst, e Styrrächnig oder e Brillefueter

Oder eppis, wo am Däschli draahängt - zem Bispill my Schwiegermueter.

In de BL-Kindergärte mache si Purzelbäum - denn d'Kinder sige yybergwichtig

In dr Pause git's nimm Mayo-Sandwiches sondern Epfel - i find das richtig.

Die Idee vom Bildigsdiräggter Wüthrich isch brillant, das mues me scho sage,

Aber wenn ich ihn seh denn dägg i: «Dä kennt au e baar Purzelbäum vertrage»!

Vorhand, Rugghand, Lob oder Slice

G'lingt im Roger so e Schlag, macht s'Publikum e Höllemais.

Är haut mit em Schleege volley, longline - oder au hinter em Netz duure,

Andersch d'Martina Hingis: Die haut s'Racket ihrem Maa uff d'Schnuure.

Im Färnseh han i dä Bättscheler gluegt, denn ich bi jo ziemlich digghyttig,

sythär hett s'Wort «Vollpfoschte» fir mi ganz e neyi Bedyttig.

Und däne Fraue, wo deert mitmache, sag i: «Ihr miend nit versuure!

Wenn ihr dr Bättscheler nit grieget, denn git's jo no die ledige Buure.»

In dr Migros und bim Denner, do kauf i nit so gärn yy

Au im Aldi und im Lidl isch kai perseenligi Note derby.

Im COOP «für mich und dich», do gfallt's mir, das sin Super Strategie

Die schigge mir sogar d'Kontousszüg vo mine beschte Kollege.

Die hyttigi Jugend isch gar nit so schlimm - me muess das do au emol nenne,

Es git sogar mänge, wo dr Name vom Schwyzer Armeechef tuet kenne.

Grad letschhi sait mir e junge Typ, wo ich ihn nur e bitz uff d'Foltere spann:

«Ey Brueder, pass uff Alte, – sunscht ich mach dich «p(B)latt Mann».»

Gilbert Gress:

Chers amis de Bâle, an Schweizer Fernseh - isch bin die grösste Star,

grösser als Schawinski, grösser als der Salzgeber – mais oui, das ist wahr.

Wenn jemand hat un problème man kommt chez moi und isch habe soeben

Herrn Conseil Fédéral Maurer die Adress von meine Coiffeur gegeben.

Wär das alles das uff däm Helge isch, hän ihr Euch sicher au scho gfrogt,

Also – das isch dr Putin, wo bi Pussy Riot am Schlagzyg hoggt.

Das isch dr Wessels und das d'Oprah Winfrey, wo sich im Däschli-Gate verirrt

und das do isch dr Christoph Mörgeli, wo grad vom'ene Aff bisse wird.

I bi mit eme Päärli Schi, emene Sagg Kaffi und ere Rose

letschhi e Konzärt vo dr Vreni Schneider go loose.

Am Schluss han i welle Stagediving mache, aber i bi denn vorhär wieder gange

denn die andere Zwai, wo no deert gsi sin, hätte mi nit kenne uffange.

D'Alice Schwarzer hett e paar Fränggli uff d'Sytte gschyffelet

Und hett sich dodermi ihre Ruef als Moralischtin vertyffelet.

Die greschti Stroof fir die Emanze wär – ich sag das ganz drogge

Wenn sie zämme mit em Uli Hoeness in dr gliiche Zälle miesst hogge.

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Fasnacht 2014



Ändlager

Im Neattunnel ganz tief unde
het dAtominduschtryy en Ändlager gfunde
au Italie findet's nit ganz ooni,
und entsorgt grad deert dr Berluscooni

Dennis

Si steene uff'm CenterCort um dWett,
dr Rotscher, Dschoko, Raffa und Gasgett,
was mainsch, wie bi dääne d'Poscht abgoot,
wenn vor dr Diir es Paggli vo Zalando stoot.

vomelai

Im Pargg uff eme Bänggli – ganz elai,
in dr Beiz bim Bierli – ganz elai
au im Stüggizenter - ganz elai,
ändig geen die Schwoobe vomelai hai.

Gool

Das isch `mol e Gool, e Gool,
das isch `mol e Gool, e Gool,
das isch `mol e Gool, e Gool,
Danggscheen Alex und lääb wool.

(Un)wätter

In der BAZ kasch lääse, im Norde saichts,
im Syyde saichts, s'ganz Joor duur saichts
dä Saich, dä macht aim ganz verruggt
und dä Saich wird au no z'Ziri druggt.

Pändler

Ass me im Zuug inne nimm muess stoo,
selle alli Pändler and Kasse koo,
mir Kondiggteere pändle glyy nimme mit,
bi dääne Pryyse räntiert jo s'Schaffe nit.

Landeshymne

Nimm zytgemäss und zue pathetisch!
Schyynts bruuche mr e Hymne wo modärn isch

Lalalaa, laalaalalaa,
Lalalaa, laalaalalaa,
Laalala, laalalala...

Unsre eigne Thäggscht hämmer denn blyybe loo,
mir wänn jo nit wäge Rassismus ind Kischte koo.

Roothuus

D'Beamte vom Roothuus fyyle sich gschteert,
will d'Bsuecher nit wisse, was sich gheert,
neui Gitter selle de Beamte dinne nitze,
und eych dusse kasch so vor dr Regierig schitze.

Im Zuug

Im Zuug no Basel hämmer e Bäärli uffgschreggt,
fidleblutt hän sis tryybe, s ganz Abteil beleggt
si sait, z'Ziri in dr Sexbox syyg si so elai,
do syyg si doch lieber „underwäggs dehai.“

paradyysisch

Syyde Bitschi, Wasserbett,
Bedienschteti, Service komplett,
Guurmekuchi - 5 Sterne Koch
so schääbig betreut lyydet dr Carlos doch!

s'Miggeli

S'Miggeli findet's schampar glatt,
wetzt mit em Rollator gwer duur d'Stadt,
si woont am Barfi, wott bizytte hai,
am Fischmärt goot si los am zwai,
iiber d'Spiegelgass an Bluemerain,
trifft s'Reesli, zämme zwitschere si ain,
dur d' Petersgass, dr Noodlebärg duuryy,
gott sei dangg, si het dr Nachthaafe drbyy,
Vom Steinegraabe ind Steine aabe,
e Stägä, do miesst si dr Rollator draage,
nei, dr ganz Wääg zrugg an Koolebärg,
underwägs iberfaart si none Gartezwärg,
denn abwärts mit em Waalholz eme Raiber noo,
am Barfi het är ains iber d'Biire bikoo.
Am nini dehai, stellt si dr Rollator aane,
was Ihr jetzt dängget, das diemer eraane,
vill neecher wärs gsi duur d'Falknerstrooss.
aber d'Innerstadt isch neierdings jo Faarzyyg loos.

Wäggwäärfsegg

Wäggwäärfsegg verbiete, das hänn si z'Bärn welle,
anderi diskutiere was si eppe koschte selle,
nur d'Zircher luege ganz verkläärt,
die Segg sin au in hundert Joor no nyt wäärt.

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Fasnacht 2014



Mir zwai – mir sin zwai Pfadibuebe und sin allzeit bereit
und mir vollbringe alli Daag e gueti Tat zu zweit
Mir hän dr Ophra e Briefli gschriebe, Krokodildäschli sin grangg neume duure
Mache si doch – us de Zürcher so Däschli – die hän au e grossi Schnuure

Dä Schrillalarm vo dr Bolizey isch e riese grosse Hit
Aber bruche deerfsch dä – nyt iiberaal – bim Märtplatz zum Byspiil nyt
Worum dä uff däm Blatz nyt nützt – hän mir kiirzligg doch verstande
Es sin drum deert – syt langer Zyt – scho 7 Pfiiffe vorhande

D'Sylvie – ex van der Vaart – die würd uns au no ligge
Mit Männer hett si nit so Glügg – aber alli wänn se...tröschte
E Italiäner würde mir vorschloo – aber eine mit richtig Rasse
Si heisst jo jetzt wieder Meis – und e Kolbe würd doch passe

Aine wo in Züri woont – hett uns gsait – är fänd'is schlächt
Das ‚Tour de Suisse‘ durch d'Stadt isch gfaare – do hett är sicher rächt
Züri hett scho gnueg Broblem – meint är und sy Hund dr Bello
Do bruchts denn sicher nyt no meer – Junkies in dr Stadt mit Velo

E feini Pizza mit Pilzli druff – hän mir uns dörfe bstelle
Dr Pizzaiolo kunnt viel z'spot und 100 Frangge hett är welle
Denn luege mir uns zwai grad a – findes e bitzli tüür
Es isch wäg dr Parkbewilligung – und däre Innerstadtgebühr

Wenn Si viel Gäld verdiene wänn – mien sie sicher krampfe
Als Bängger dr Stutz verschiebe – oder stundelang Beton stampe
Mir zwai sin – zwai schlaui Buebe – mache Kohle das es kracht
Und hän denn bi dr – Sozialhilf Basel – e Kickboxschuel uffgmacht

Mir würde dass dr Wessels – dur unseri d'Stadt ka längge
Ihm e Velo mit Ruggdrittbräms und ovale Räder schängge
Es lauft nyt rund und wenn är denn – wiederemol im Stau duet hängge
Ka dä denn – bi jedem mol brämse – an si Ruggdritt dängge

Mi Frau shoppt fang däägligg – uff eBay und uff Zalando
Dr Böschtlar kunnt denn jede Daag – fascht wie uff Kommando
Si bstellt denn viel – s'passt oft nyt – no packt si's wieder yi
Jetzt maint dr Doggter – e typische Fall – vo Shoppingbulemie

Zwüsche 8 und 12 do mien mir – unser z'Nüni ässe
Denn isch Mittag und am Nomi – könne si's grad vergässe
Z'Obe möge mir scho nym und wänn denn au nym schaffe
So stoot das im Arbeitsblaan vo unserer Luftwaffe

Ziri brucht e neue Name – und zwar ein mit Rasse
Sommerau – hän mir uns dänkt – würd prima zur Stadt basse
E Namenswäggsel – isch ächt bömig und – au no richtig schlau
Denn Ziri isch im Winter scheisse – und im Sommer au.

Abloose, Bespitzle und Spioniere – dass es nur so gracht
Hüt sin mir sowitt das jede – e jede iberwacht:

D'NSA hett bi dr Angi Merkel – im Natel so e Sänder
Drby wärs besser die hätt – dr Leupe entlang e Gländer

Syy, dr Ghaimdiensch hett dr Eric Wäber – mit Video iberwacht
Wo die das wysse Fuddi gseen – isch d'Laitig zämmegracht

Au dr Thurnheer isch abgloost worde – sy dass isch e harte
Die hän denn s'ganz System – wäge zvyl Gschnuur – nei miese starte

Dr Mike Shiva hän sy kontrolliert – hett me sich verzellt
D'Position vom Satellit hett's denn – de Amis grad verstellt

Die hän sich jo grad – es isch e Schand – d'Auge afo riebe
Will dr Ex-Chef vo dr BVB Verkehr öffentligg duet betriebe

Die wüsse au worum in Sotchi so viel Polizei duet umestoo
D'Russe hän usegfunde, dass au dr Minu wurdi koo

In Ängland hän sy spioniere wölle – aber das hett nit guet gändet
Dr Prinz Charles hett mit sine Schüssle – das Signal grad retour gsändet

D'NSA het d'Sibel Arslan bespitzlet – die isch im's grossi Root
Die hän – wie d'Arslan au – nyd checkt um was es dört so goht

Mir zwai sin jetzt fertig do – und göön drum aine witter
Zum Abschiid sage mir Euch im Gheime – das isch zimmlig schitter
Är und Dä und vielleicht Die – die hän ihr Gäld in dr Coop Bank Filiale
Drum wüsse mir – die könne do in – ihr Bierli gar nit zaale

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Fasnacht 2014



Grienschnäbel

Mir Junge rede viil au oni z iberlegge,
dien gärn denn unsri Alte bitzli negge.
Blyb suuber heisst bi uns nimm kaini Drooge,
dr Balmer isch nit suuber dä het glooge.

Mechtsch vorwärts ko und Di schnäll profiliere,
muesch biggle, krampfe amme au no schmyyre.
bisch au no guet im SMS verschigge,
wurd d Fierig vo de BVB dinn ligge.

In dr Appideg wirsch mit em Arzt verbunde,
my Omi het e Bobo, wyter unde.
Per Internet macht är denn so e Schnälltescht,
ihri sextangas sitze wirgglig z fescht.

E Fääri die isch aifach ganz verschwunde.
Am Räche z Kemps hett me si wiider gfunde.
E jede Baasler weiss, dass, isch e Bull-Schitt,
jä gschtriggti Fäärisaili hebe nit.

In Ziiri het s jetzt ney au Drottarschwalbe,
wie Stute wärde die in Boxe ghalte.
Dr Strich ka fir die Dame nym rentiere,
wenn d Schugger jetzt dert au no mit kassiere.

Händis, Schoggi, Autobaanvigniette,
und Leesli, Biecher, Heergrät au Serviette,
das alles kasch in dyner Boscht jetzt kaufe,
nur muesch fir Zaalig zem Empfänger laufe.

Mir hän Byyljee und wän e Match go bsueche.
Wie Schwärverbrächer dien si uns durchsueche.
Mässer Faggle wärde si nit finde,
nur Zigi mien gli au emool verschwinde.

Ich mach no schnäll e Selfi und e face-duck.
Und stell denn das grad no ins Facebook.
Ich bruch kei antidepressivi Pille,
Will nur cool im Zimmer umme Chille.

Mi EC Kaarte duet nimm funktioniere,
kai Gäld me druff, kaa s gar nit kontrolliere.
Bim letschte Uuszug vo de Coop Bangg ich spinn,
han ich au no grad dä vom Conti dinn.

Mi Bappe isch Boss und ka nur delegiere,
dehai duet s Mami aber kommandiere.
Ich ka nimm zwische Stiel und Bängg me groote,
Mir hän bi uns scho lang e Frauequote.

D NSA duet umme spyooniere,
und alli E-Mail könne si scho kopiere,
iber Baasel hän si wenig uusegfunde,
drumm sin si mit em Mike Shiva verbunde.
Ganz kurz het är si derfe informiere,
dr Vertraag dien si ganz schnäll denn no storniere.
Si Gschwaafel het ne schambaar rassig uusghängt.
und Natel Keschte grad ihr Budget gsprängt.

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Basler Fasnacht 2014



ALBI EINSTEIN

Schnitzelbangg-Theorie



VSG Verainigti Schnitzelbangg Gsellschaft

Es hett emol e Baschi Dürr gä, schyns gäb's en no, me haig en wieder gfunde
dasch dä mit em Cabriolet obe und em Verdegg dunde
dä isch emol ins Baselbiet yglaade worde vo de Rambasse
an e Landwirtschafts-Usstellig mit Vieh vo alle Sorte und Rasse
denn hett e Zyttigsjournalischt vom Baschi welle e Fotti mache fir sy Blatt
und gfunde, dr Baschi im Saustall so zmits in de Sey wär doch no glatt
no isch dr Baschi halt zu däne Sey iine und maint, aber do inne stinggt
und am andere Daag isch in dr Zyttig unter däm Bild gstande : Baschi Dürr, dritter von links.

Dr Hansli und dr Kurtli uss dr 5. Klass hänn uff em Schuelwäg wie gwohnt
alli Daag näb däne neje Sex-Boxe in Ziiri verbyy miesse, si hänn in dr Neechi gwohnt
d'Muetter vom Hansli hett em denn verbotte bi däne Boxe go umme schlyyche
es sey deert nämmlig emol e Maa zu Stai erstarrt, und ihm passier denn s'glyyche
drno sinn aber die Limmel glych emol deert go gnaisse
und hänn e paar so Dämli gsee in Minireggli und Heesli so haisse
no sait dr Hansli zum Kurtli, zu Stai erstarrt sey do emol e Maa
kumm mir haues haim, mi Muetter hett doch Rächt, bi mir fohts au scho aa.

In dr Chefetage vom Tram, also was sich die sdeert erlaube
deert goht's jo zue wie im helzige Himmel, s'isch nit zem glaube
die hänn nit nur e glains Bonsai-Brobleemli deert
die hänn e 360-Grad-Panorama-Chaos, dasch gsteert
wenn die deert e neje Diräggter ystelle
wie das denn ablaufft – mecht ych Eych jetz verzelle
bim Vorstelligsgspräch, wie das eso isch
do sitzt dä Bewärber vor eme grosse Disch
uff däm Disch stoht denn e Glettyse, e Staubsuuger, e Computer mit Taschtatur
und e Microwälle, e Schrybmaschine und e Kuckucksuhr
denn froggt ain vo dr BVB dä Bewärber ganz salopp
wenn si uns sage kenne – weeles dr Computer isch, denn hänn si dä Job.

Do hänn's emol wieder e neje Papscht gwählt gha
und au wieder e Katholik und nodyrlich au wieder e Maa
und glyy nach Amtsaatritt isch dä an e paarne go d'Fiess wäsche – als Grischt
äntwäder isch das e katholischs Ritual – oder är isch Fuessfetischischt
uff alli Fäll sait dennm dr Aint, Herr Papscht, das kitzelet mi aber an de Fiess – Eehrewort
no maint dr Papscht, drum mach ych's jo, mii kitzelets ebbe au, aber amene andere Ort.

Bi däre Bangg-Theorie sitz y jetz ab, uss Solidarität, isch besser emänd
denn vo däm woni jetz verzell, dä sitzt ebbe au im Momänt
das isch zwar e harte Fätze, aber er hett e waiche Kärn
und sunnscht isch's jo e Liebe und y han en irgendwie gärn
är liebt halt dr Luxus und e scheeni grossi Wohnig
und er ka sauguet Thaiboxe, aber Wältmaischter isch er noonig
y sag iiberhaupt nyt Beeses iber en und tue n'en verschone
dä kunnt nämmlig au wieder emol uuse und waiss wo my Huus duet wohne.

Dr Fährimaa hett emol ins Spittel miesse eppis go lo operiere
und grad nach dr Operation isch er uffgstande und in de Gäng go umme spaziere
no gseht ihn dr Doggter und sait : Was laufe sie jetz scho umme
do könnte doch d'Fäade rysse an dr Narbe – sie Dumme
no maint dr Fährimaa – he das find ych jetz au no gail
no sinn bi Eych d'Fäade au so dinn und verrysse – wie my Fäährisail.

d'Frau Gass hett d'Frau Schild droffe bim spaziere
no maint si, was sage si au zu däne vyyle Yybrüch in d'Hyysen wo do immer passiere
no sait d'Frau Schild, y mag hitt nit schneere, y ha so Kopfwee – s'isch zem gruuse
dr Doggter hett zwor gsait, ych sell z'Nacht bi offenem Fäschter pfuuse
jä hett's denn nyt gnitzt, maint d'Frau Gass, isch's Kopfwee nit ewägg – Frau Schild
he nai isch's nit ewägg, aber wäg däm offene Fänschter derfir my Portmonnai, dr Schmugg und e Bild.

E Frau hett emol e Brief gschriebe gha
an d'Versicherig – wägeme Unfall vo ihrem Maa :
Liebe Mobiliar – mein Mann ist vom Stammtisch nach Hause gekommen
nd auf dem Nachhauseweg hat er von hinten einen Schlag auf den Kopf bekommen
das ist zwar nicht so schlimm, er wird's überleben
aber ich hab da noch einen grösseren Schaden anzugeben
denn bei dem Schlag ist mir mein Wallholz kaputt gegangen, so ein Minggis
Mit freundlichen Grüssen – Martina Hingis

Es isch emol e Baslerbebbi im Ozean schiffbrichig worde und gstrandet
und isch ganz ellai uff ere einsame Insle glandet
er hett deert langi Zyt iberläbt vo Pflanze und Fisch
bis aines Daags e Boot mit ere junge scheene Blondine bi ihm gstrandet isch
wo se dr Bebbi gseht dänggt er, jetz isch's verbyy mit dr Rueh
denn styggt si ussem Boot und goht uff dr Bebbi zue
und sait, ych ka dir jetz ebbis biete wo du scho lang nimmi gha hesch und s'isch alles dii
no luegt se dr Bebbi aa und maint, jetz muesch numme no sage, haigsch e Ueli-Bier derbyy.

Es isch emol ain iiber die Mittleri Rhybrugg spaziert
und hett im Rhy unde ain gheere schreye und hett d'Händ verriert
und hett gruefe y ka nit schwimme und gstramplet mit de Ärm und Bai
no rieft dä uff dr Brugg, sag emol wo wohnsch denn du, wo bisch du dehai
no gurglet dä unde uffe, in dr Gellertstrooss 20 im Parterre unde
no sait dä uff dr Brugg: also tschüss, jetz wird aini frey, jetz hani z'Basel ändlig e Wohnig gfunde.

D'Angela Merkel isch emol in St.Moritz go Langlaufschi kaufe
und isch denn mit däne, aber nit lang, Schii-lang go laufe
es hett se drum uss dr Loipe-Spur gschnätzlet bim aabe bloche
und hett sich bi däm Sturz dr Beggi-Gnoche broche
im Spittel isch denn d'Schweschter ko mit Spritze, Katheter und Tropf
und gseht dr Assitänz-Arzt wie'n'er figureetlet an dr Merkel ihrem Kopf
und sait, si hett denn nyt am Kopf – hösch Digge
si hett e Beggibbruch – und deert miemer jetz fligge
ou Entschuldigung seit dä, aber wo'n'y dä Kopf jetz so aagluet ha
so ha'n'y jetz wirgglig gmaint, die haig mit däm Gsicht e Unfall gha.

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Drugg: Amerbach'sche Druckerei, Muttenz



d' hooseglunggi 2014

An deere Fuessball Champions League
Goots jo numme umme Sieg
Vorem Spiel en Addraggtion
Abseile loo im Stadion
Was hänn die gwunne frogt ain dumm
E Duurnstund im Terzianium

Nägschtens wird ich bangsioniert
Ha das letschthin ussbrobiert
Am Moorge goots in d Manicure
Am Noomidaag in d Pedicure
Zooobe foot dr Kopf aa dampfe
I bis nit gwoohnt e soo vyyl z grampfe

Dr Schwinger Gisler muess zem Tescht
Deert stellt me Dopingmissbruuch fescht
Är haig by synere Frau dehai
Dr Spray verwägslet haiaiai
Dä Typ dä stellt me jetz an Pranger
Mi Froog wie wird e Schwinger schwanger

Jetzt macht me by dr BVB
En Analyse was isch gscheeh
Was lauft do nimm ganz uff de Schiine
Welle Cheff sticht welli Biene
Drämmeler sin jetz wider freyer
Es schwätzt kain me vom flotte Dreyer

Rauchverbot im Stadion
Ohni Zug kai Emotion
I froog mi was mir ässe sotte
D Rauchwiirscht wäärde au verbotte
Dr Streller loot sich au nit lumpe
Är muess verzichte uff sy Stumpe
D Balle isch au nimm uss Lääder
Drfir griegt jede Fan e Klääber
Rauchloos an Match vom FCB
Mir wänn jo alli Spieler seeh
Es will kain Dampf abloo verglemmi
Drumm goots nit ohni – Huggel Benni

Jetzt goots no schnäll um d Vignette
Die bruuchts doch nit was wämmer wette
Vo Basel uff Ziiri und wider zugg
Denn faahrt no aine inne Brugg
Hätte mir kai Pändlerwahn
Bruuchts uff Ziiri kai Autibahn

Sii sin doch lieber deggadänt
Als numme Cliquepreesidänt
Groossi Schnuure Daag und Nacht
Skrupellos wänn sii an d Macht
Bringts ihne nyt isch das e Qual
So nutzlos wie – dä Club de Bâle

Als aggtive Regierigsroot
Kunnsch mitem Stutz in hegschti Not
Das mecht ich au emool erlääbe
Nooh dämm Amt wird ich jetz strääbe
Dä Job dä macht mi grausam aa
Deert kaasch e huffe – Conti ha

In Ziiri an dr Bahnhofstroos
Isch allewyyl dr Deifel loos
Do hett aini e Däschli welle
S Fräulein sait – wänn si mi schelle
Die Gumsle isch halt nit so gscheit
Drumm isch si in das Däschligate

Dr VW Kääfer war beliebt
Wer sein Auto liebt der schiebt
Bym gääle Ängel wird manipuliert
Bym zelle hett sich ain trumpiert
Si bschysse no – bym Pryys vergeeh
Do sait e Schwoob – ADeeeAC

Doo hett mi doch ain unschyniert
Bym Boxestopp fottigrafiert
Das Fotti ligt by mir dehai
Liege hänn jo kurzi Bai
Do sait my Frau – si kunnt vo Schliere
Gäll – deert kaa me guet parkiere

Im Proobettraining sait mir dää (Skippe)
Ich sott e bizzeli abnääh
S Mannschaftsliibli gits nur bis L
Ich bruuchti schyyns en XXL
Do saag ich dämm was wottschesch no dringge
Lieber Digg als fir GC gingge

By Meergel und em Sargosy
Isch d Liebi nooni ganz verby
Si simmslet ihri Liebesgriess
Är finde si no zimmlig siess
Mainsch blybt das Ghaim was mir do wänn
Do schrybt ain zugg – yessss we can

Wottschesch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder gooschesch uff, www.vsg-basel.ch

Fasnacht 2014

Blagèèr



e VSG Bangg

Dr Hitzfäld wo bald nümme am Spielfäld stoht
Isch dr erschti Schwoob wo freiwillig d Schwiiz verloot
Viil lieber würde mir eych aber verkiinde
dr Wessels will Haim uff Sankt Galle verschwiinde

Reifewächsel, Velo pumpe, Brülle richte
Bluetdruck mässe, s Huus verkaufe, s We Ce dichte
Badeschläppli, Pampers und ei Liter Moscht
das alles griegsch du nächstens uf dr Poscht

Die «Kathe» us England isch nümme in dr Brunft
Ändligisch sie umme die royali Niederkunft
Und wo dä Klei d Camilla seht denggt sich dä Spross
«Lueg aa. Das isch bestimmt im Charles si Ross»

Ich «date» das isch hütt doch logisch und normal
Fraue nur no via Internetportal
Ich log mi immer ii- jä- und drum betonis
Mit falschem Name und me Bild vom Adonis
Do mäldet sich eini e super Kätzli
Und schribt: Sie suecht zum Schmuuse no e Plätzli
Am Barfi trifft ich sie denn jo, so mach ichs amme
Und wär wartet dört uff mi?? Mi Schwiegermamme!

Ich wohn am Rhy und sitze am Zmorgetisch
Do triibt ein verbii und hebt sich a sim Wickel-Fisch
Do seit mi Frau ganz fräch und munter
Mit dinem Schwimmsack gohst du au nit unter!

D FCB Spieler! Jetzt muesch guet loose
Hänn s Fäldschlössli Logo uff de Hoose
Nur dr Dääge het e anders und erscht no uff em Gsääs
Nämmlig das vo Emmethaler er schuttet jo au Kääs

Die Ober-Moorä also unsre Guy
Het e E-Bike und das überall derbii
Was ich jetzt do derzue no sage wett
Das isch s Einzig an ihm wo Atriib het

Dr Eric Julliard isch e Tuusigsassa
Füllt mit de Tattoo's ganz guet sie Reisekassa
E Ambulanz heig er jetzt kauft es isch e Glou
Die macht jo schliesslig au Tatüü, Tattoo

Dr Ueli Murer jä ich bi baff
Seit imene Kameramaa eifach - «Aff»
Sicher het dr Ueli nume do muess i grinse
Sie Spiegelbild gseh in dr Kamera Linse!

Überall hörsch Türkisch und Afrikanisch
Us jedem Egge tönts Russisch und Mohamedanisch
Sie schnuure Elektrisch und Assiatisch
Also langsam wärde mir d Schwoobe no sympathisch

Ich ha e Problem! Also: het mi Frau befunde
«Vo 0 uff 100 uf dr Woog in 2 Sekunde»
«Dr Balascht mues wäg», seit mi Frau dernoo
Vom Fett ha mi jetzt trennt: Jo! Ich ha mi scheide loo

Minre Frau ha ich verbotte s isch doch e Spleen
Go schwimme goh mit me richtige Delphin
Do seit die fräch zu mir und glatt wie e Aal
Denn gang ich halt mit dir denn schwimm i mit me Waal

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Fasnacht 2014



LUUSZÄPF E

Dr Aetna het im letschte Winter grumplet wie verruggt:
het Riise-Aeschewolgge und au Lava uusegspuggt!
Trotz allem isch das positiv, hänn mir bilanziert:
S'git wenigstens no ebbis, wo z'Italie funggtioniert.

In däne neye Sexboxe hesch luschtvolli Gedangge,
und Männer fille dert die erschte Drive-In Soomebangge.
Mir hoffe schwer, sie bruuche denn e Gummi bim Verkehre,
wär will denn scho, dass Ziircher sich unkontrolliert vermehre?

Die «Ains zu zwelf»-Initiative isch nit duurekoo.
Isch mir doch glyych, bi mir dehai lauft das scho lang esoo:
Mi Frau het das perfeggktioniert, denn sie kunnt wirggligg druss,
denn jede Stutz wo-n-ych verdien git si grad zwelf Mol uss.

Es goot duur Grääbe, iber Hügel, und duur schmalig Gäng.
Linggs und rächts do isch es gfeerlig, und drzue no äng.
E Helm isch Pflicht, und Stiefel au, waisch nie wo's duure goot,
dr Wääg isch schlächt, und s'het vyll Zyg wo quer drin ummestoot.
Am Schluss kunnt no e witte Gump, und de fliegsch fascht uff d'Schnuure
so mien mir jede Daag duur d'Kunstmuseum-Baustell duure...

Das neye Ziircher Stadion bruucht vyll Zyt, kunnt nit in Gang.
Genau so wie's Atomändlager, bis das kunnt goots lang...
Mir hätte en Idee wie me das zämme kennt verbinde,
denn wurde die Brobleem grad baidi mitenand verschwinde:
das Ändlager muess unters Stadion, das wär s'Ideale,
denn könnte d'Ziircher nach em Schutte au mol richtig strahle.

Mi Frau het Fraid am Negligé – ich ha's ihre gschänggt.
Au d'Grössli obeduure basst, das hätt ich gar nit dänggt.
Sie frogt mi no: «Wie hesch das gschaft, das gränzt an Zauberey?!»
Ich lächle nur und dängg im Stille: Danggschön NSA!

Mit däne neye Energie kasch bim Autofaare
d'Umwält schoone und au no bim Tangge Frangge spaare.
,S git Wasserstoff und Sunnekraft und Bioethanol,
nur im Wallis faare d'Männer gärn mit Alkohol!

D'BAZ het d'Walliser belaidigt, hänn mir mitbikoo
Trotz allem git's von uns kai Mitlaid, die miend das verstoo.
Uns goht's jo no vyll schlimmer, das isch wie-n-e Schlag in Maage:
mir als Basler mien das Käasblatt jede Daag erdraage...

Piramide, Ängel, Pändel, Kugle ganz uss Glas.
Sit däne Esoterik-Dääg stoot mi Frau uff das.
Mit ihrer Winschelruete lauft si umme jetz dehai.
«Het si wirggligg Wasser gfunde?» «Jo, in ihre Bai...»

Zem Coiffeur, Massage und denn no ne Stund zem Psycholoog.
No Klaider kaufe, Aquafit, und Hilf vom Aschtroloog.
Das alles kunnt saudüür, isch my druurige Befund:
Das isch nit für mi Alti, nai, das alles bruucht dr Hund!

Dr Diräggder vo dr BVB verschiggt dr gröschti Schutt
är isch uff däne Föteli, und au no fidleblutt.
Doch aini wo das Bild bikoo het, het sich grad beschwärt:
«Dä Typ do uff däm Foti isch im Stoosverkehr nyt wärt!»

In dr Antarktis isch e Schiff im Ys inn stegge bliibe
won ich das ghört ha, han ich g'jublet, s'isch nit übertriibe.
Wo au no d'Rettigsschiff yyfriere, bin ich Fyrr und Flamme
dr Grund isch aifach: Uff däm Schiff do hoggt drum d'Schwiigermamme.

Im Rindsghackte hets Rossfleisch drin, s'kunnt immer wiider vor
Und in der Kalbsbrotwurscht findsch wenig Kalbfleisch, das isch woor.
Rahmdääfeli hänn fascht kai Rahm, was macht das für e Sinn,
sogar im Zürcher Gschnätzlete het's nit ai Ziircher drin!

Dr exklusivi «Club der 100» zieht im Spillmaa yy,
wotsch wisse, was dert inne lauft, denn waije mir di yy:
D'Tamara Wernli stoot vorusse, lägg, isch die verläbt,
wenn die so aalueg, könnisch maine, s'Trudi Gärschter läbt.
Dr Morin stoot im Foyer und het grad e Cüpli gfasst,
denn Hundsverlochte het är bis hyt no nie verbasst!
Und au dr Conti stoot deert inne, lässig an dr Wand,
und wenn du mit em schwätze willsch, macht är die hooli Hand!
Dr Baschi Dürr fasst grad e Job, denn Personal isch gnabb:
är goot, wie-n-är das gwoont isch, ab in d'Kuchi und wäscht ab.
Dr -minu schläggt e Schoggistängel, hebt dr Koch am Arm,
und sait em: «Sone Schoggistängel - han ych am liebschte warm»
Do schreyt ain: «Mach die Diire zue, und due nit widerspräche:
Vorusse stoot drum d'Striggedde und will do yynestäche!»
Sit Stunde isch ai WC bsetzt, was isch ächt derte gscheh'?

Von inne ghörsch e schyychi Stimm: «Do hoggt e Sans-Papier».
Dä Name vo däm Club, dä isch Programm, das kennt me maine:
nur wirggligg hundert isch dert inne garantiert e kaine!

Wotsch au by uns bänggle?


Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Fasnacht 2014



25 JOOR NACHTSCHWÄRMER

Dä armi Beamti us de USA
Muess in d'Ferie, will me iin nimm zaale kaa
Sit äär bi uns isch, het äär nyd me z'lache
So vyyt han ich no nie miesse mache

***Isch d'Fasnacht umme, hämmer s'Gfüül
Blyybt äär do, und verlangt Asyl***

I stand bim Doggter, numme in Unterhoose
Äär foot grad aa, mi Härz abloose
I find das bitz e Schweinerey
Dää isch sicher vo dr EN-ES-EY

***Au dr Obama het sich drüber empöört
Syt äär bim Abhööre sich sälber höört***

Mir wänd wüsse, was uf dr Wält so lauft
Und händ e Abhörgräätli kauft
Bim Abloose ghööre mir d'Merkel lalle
In dr Schwiz sig si.... ähhhh... haig's iire, sehr guet gfalle

***Die Leupe findisch jetz uff dr Lischte
Mit de wältberühmte Buggelpische***

Greenpeace Aggtivische isch es glunge
Sind am Afang vom Match ins Joggeli yydrunge
Die wäre gschyyder in dr Pause koo
Und hätte drfir dr Gress mitgnoo

***Wenn's in däm Böötli no e Plätzli git
Nämed dr Salzgeber doch au grad mit***

Es platziert ein bim andere e Beschwärde
Bim Abloose hämmer ghöört, dass mir abghöört wärde
Do maint dr ander, das isch doch gstöört
Aber so ebbis han i au scho ghöört

***Jetz waiss dr Obama, wie d'Merkel ka küsse
Aber mir glaube, är wott das nid würgglig wüsse***

Dr Carlos woont, das begriffe mir noonig
Zer Stroof in ere Luxus Woonig
Jetzt wott jeede wüsse, jeedi Wett
Was dä Limburger Bischoff verboche het

***Wott dr Carlos wieder im Luxus woone, so wie friehner
Dä Bischoff bruucht sicher no e junge Mäss-Diener***

Ziircher Schugger, s'isch zem Veregge
Blyybe im Rootlicht Millieu gärn mol stegge
Bi dääne isch das halt esoo
Do wird Be-Stächig wörtlig gnoo

***Das sind FCB Fans, die Schugger im Kreis vier
Immer mit Blaulicht im Rotlicht Quartier***

E BVB Chef het so Fotis verschiggt
Wo si bescht Stigg s'Liecht vo dr Wält erblicgt
Drzue sait är nur grad soo vyyt
Ha welle zaige, d'BVB het doch Stiil

***Es isch sicher kai Zuefall, au dä kunnt vo Ziiri
Die händ fir so Sache halt e bsunders Gspiiri***

Kum schafft dr Wawrinka die Sensation
Meine d'Schwoobe, äär sig vom grosse Kanton
Si wänd iin nid wäge de Staralüüre
Sondern numme wäge sine Stüüre

***Nämnet dr Vettel, dä het gnueg Moos
Und mir wäre wieder aine loos***

D'Schwizer Armee isch grüschtet, gääge böösi Krieger
Oder halt au emol e entführte Flieger
Die luege denn scho, kaini Soorge
Aifach nid vor Ahti am Moorge

***Die Schwizer Armee isch irgendwie doof
Bruucht halt iire Schönheits Schloof***

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch





Ziircher muess me, ha mi looh beleere
Zum vermeehre in e Sexbox speere
Drumm Sexbox wägg, höscht, kunnsch nit druss
Denn stäärbe die Ziircher langsam uss

A propo Ziiri näämet`s mir nit übel
S nöi Staadion liigt au i somene Küübel
Wenn dir e Staadion wänn d, ihr liebe
He Ziircher, denn miend dir zeerscht schutte iebe

Üüberal Qualm, wie e Kemmi wo haizt
So gruusigi Luft, wo d`Naase raizt
Im Joggeli, wänd si usse mischte
Me will Rauchfreij Aarbetsblätz, für Greenpeace Aggtivischte

I frogg mi Bueb, was wotsch moll wäärde
Är sait Baapscht, dr gäilschti Brueff uff Äärde
Oder Blatter Sepp, wäär au no flott
Das isch hööcher als Baapscht, jä fascht scho Gott

Frau Merkel, dass miend si sich äifach merke
In de Bäärg, goot man nit wie si zu werke
Wenn sie beim Langlauf flüchtig lenken
Tuuts noochhäär tüchtig klappern, in den Hüftgelenken

Als Ochesknecht, wär i längscht uss de Sogge
So stuure Buure, s`Ghaiimrezäpt entlogge
Uwe loos dr saage, bliib im Flachland unde
Trotz abloose het, d`NSA nüt uusegfunde

Ich weiss nit, bi ich jetz lätz draa
Ob ich d Frauequote, verstande haa
S isch egaal, gschtoochte oder g`haue
Uff ei Maa, kömme schiinnts zwölf Fraue

D Blagette find i toll, d Uffmachig frisch
Isch klar, dass dä Waggis kai Beppi isch
S stimmt genau, s fot eim a Gruuse
Nur e Ziircher schnooggt uss em Abfall uuse

I due mi für e Bachelor uff stelle
Haa au, soo e schöne Käärli welle
Dää nimmt mi glatt, Gnall uff Fall
Jetzt mischtet däa, mi Huehnerstall

Elitepartner hän Singel`s mit Niiwoo
I ha`s probiert, ha den aber kaine Gnoo
Dr Grund drfüür, kasch dr dängge
I ha`s Nivoo im Hienerstall nit welle sängge

Dr Sempach uff em Stucki, schmuusend, hey toll
I frogg mi Maa, wänn mir nit au wieder emool
Äär maint, di Wunsch isch mir befääl
Jetzt schlooffe mir imene Huffe, us Säägmääl

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch





Fasnacht 2014

**Stellet Eych vor dasch mi Meggerisagg
mit däm muess ych zämme huuse
wenn ych däm ebbis saag denn goht's
in eim Ohr iine zem andere uuse.**

*Wenn ich aber zu mim Bääse do
ebbis saag das isch zem gruuse
denn goht's in beidi Ohre iine
und kunnt zur Schneere uuse.*

**Ych ha do letschdi emol wieder welle
mit dr Fähri ibere Rhy
do het mer die do noch gruefe
hesch dr Reisepass derby.**

*Do hett dä nodyrlig wieder gmegeter gha
aber weisch halt nie bi dr Fähri
also ych wär froh ych hätt dr Pass derby
wenn y pletzlich in Holland wääri.*

**Und wenn denn uff dr Fähri bisch, hesch denn au kai Wunsch,
kasch froh sii das em Bach durab, nit uf Ziri kunsch!**

**Mi Meggerisagg duet in letschter Zyt
zoobe als aifach verschwinde
und goht denn in d' Beiz go jasse und suffe
das muess ych jetz unterbinde.**

*Jetz will y se tüsche und ha au scho e Trigg
y legg s'Käppli verkehrt a bim goo
no maint si, wenn y s'Käppli verkehrt aa ha
statt uuse wurd iine koo.*

**Sächs Monet hett's s'letscht Joor numme gränet
und gschifft und gsaicht und gspritzt
me sait zwar Räge miechti scheen
bi däm hett's zwar nyt gnitzt.**

*Aber au bi däre hett dä Räge nyt brocht
im Gegedail hejoo
die hett doch vo däm suure Räge
no dr suurer Stai bykoo.*

**Ych ha jetz au sone Alarm-Sireenli
wenn'd am Schnierli ziehsch tuet's pfyffe
jetz sell's emol aine probiere bi mir
däm wurd ych d' Eier schlyffe.**

*Das isch bi däre doch iiberflüssig
e soone Apparäätli
wenn die denn gaitscht und gaxt und gyxt
teent's lütter als das Gräätli.*

**Mi Bääse gnyyblet als in de Ohre
und das sogar bim schmuuse
wenn si denn no in dr Naase bohrt
denn foht's mi afo gruuse.**

*Dä sell doch nit so pingelig due
dr Papscht macht das schyns au
nur dä tuet's nit bim schmuuse mache
und sicher nit mitere Frau.*

**Dä goht als go laufe mit sym Kolleg am Rhy
das sinn mir no zwai Gselle
denn hett er zuegluegt wie ein fische tuet
aber dä sell er jetz sälber verzelle.**

*Zwai Stund hani zuegluegt, wie ain fischt am Rhy
mit Faschtewaje als Kööder
ych glaub s'gitt nyt blöders als fische hani dänggt
doch Zueluege dasch no blööder.*

**Wo das Prinzli in Ängland uff d'Wält ko isch
hani gsait zu mim Sagg bim Ässe
y hätt nomoll Luscht fir soone Buschi
do maint dä das kasch grad vergässe.**

*Das hett au si Grund, denn bi dr letschte Geburt
han'y im Spittel briel vor dr Diir
no rief si uss em Bett jetz briel doch nit
du kasch do jo nyt derfür.*

**Wäg däne vyyle Ybrüch in d'Hyysen
hany z' Nacht jetz Angscht bim penne
drum loss ych au in alle Zimmer
die ganz Nacht s'Liecht lo brenne.**

*Hänn ihr das wieder gheert vo däre
dasch typisch fir mi Grampe
du muesch nit äxtra s'Liecht lo brenne
d'Räuber hännjo Taschelampe.*

**D' Merkel kunnt wenn sie Ferie macht
im Winter uf St. Moritz
und gheyt au wenn sie d' Schii ahett
gärn emol uff d' Schnitz.**

*Jetz sig doch nit so sträng mit dere
das ka jo mol passiere
sie sett halt wenn sie d' Schii ahett
nit mit em Obama delifoniere.*

**Jetzt liggt sie im Spittel die Ärmschti
und an dr Diir stooht – bitte nicht stören
denn kunnt dr Arzt ins Zimmer und sait
Frau Merkel ich muss Sie abhören.**

**Jetz muess me am Daag immer Liecht ha am Auti
das passt em aber nit so mym Bolle
denn kirzlig fahrt er sogar am Halb Zwai am Morge
ohni Liecht ine Polizey Kontrolle.**

*No froggt mi dä Schugger wo goht's um die Zyt no ane
no saag y, y muess ane Vortrag am Zwei
um die Zyt ane Vortrag, das glaub ych nit
he doch bi mym Bääse dehei.*

**Jetz hätt min e Job als Nachtwächter gha
aber är findet das e Flop
do muess me halt wach sy alles ghöre und gseh
das verlangt halt sone Job.**

*Do hani däne gsait, diend doch fir dä Job
dr NSA Abhördienscht teschte
oder epper wo alles gheert und gseht
do wär mi Bääse doch am Beschte.*

**Y bi z'Ziiri gsi und hätt selle s'Auti wäsche
und fahr in sone Wäsch-Abteil
denn verlang ych e Vollpfläg mit Unterwösch
dä vergiss ych nimm dä isch geil.**

*Denn kassiert ihm ä Grytte in Unterwösch
dä Lappe hätt er kenne spare
denn statt in d'Wäschalaag isch dä Joggekopf
in sone Sex-Box iine gfahre.*

**S'isch nätt gsii bi Eych unsere Bank derfe z'singe
d'Värs kamme uf em Zeedel lääse
mir gsehn uns wieder im neggschte Joohr
Eyre Meggerisagg - und sy Bääse!**

Und dängget dra - blybet sauber!!!

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Fasnacht 2014



Ir sind perplex, genau so gseen Dir dryy
Jetzt sind au do Ussländer scho derby
Doch wenn Dir's gnau wisse wänd
Mir vier sind «Made in Switzerland»

Die Masseiiwanderigsinitiative isch so ne Sach
Drum hän mir im verschnupfte Europa Grach
Nur so ain vo uuserhalb intresiert das nit
Dä bringt mit em Asylgsuech grad e ganze Flieger mit

Die bescht Armee vo dr Wält
Griegsch nit für alles Gäld
Kai Find het e Chance, dien sie loobe
Aber nur vom achti am Moorge bis finfi z'Oobe

«Wenn sie Grippen händ, ich mach e Wett
Blyybe sie de ganzi Daag im Bett»

Es staubt, glepft und flitzt
Es gracht, beebt und blitzt
Was isch denn das fir e Rabatz
D'Merkel fliegt uff e Latz

Ob Daag oder Nacht, egal wo bisch
My Alti schnuurt di undere Disch
Vor ere Wuche haa ich sie mit em Handy in e Egge gsetzt
Sit dem isch es bi dr NSA ständig bsetzt

Das Wand-Google-Bild, dass dyyre, wo's do git
Montier ich au billiger, dass isch dr Hit
Bim uffhängge gnallts, ich haa e schwarze Kopf
Immer wenn ich dr Naagel dur e Bildschirm glopft

Mym Chef sy Frau, do griegsch s'graue
Het's scho in der Vorentscheidig bim Playboy uuseghaue
Byy somene «Fottischuhting» hets sie's jetzt gschafft-Juhee
Uff d'Syte drei im Fottialbum vo dr BVB

Die Sexboxe in Ziiri, hän Dir's mit bikoo
In dä Vergniegigspark kasch nur mit em Auti goo
Wie me sich das vorschellt isch schnäll gsait
Das isch so quasi e «Park and Ride

S'Ziiri sind Schugger ins Puff, e Skandaal
Derbyy isch das bi de Verkehrspolizei ganz normal
Zu allem hän sie jetzt no e Buess bikoo
Lut de Daame sind sie vyl z'schnäll koo

So guet, dass es jetzt e Frauequote git
Dryssig Prozänt Fraue, dass wird jo äntlig Zyt
Bi weeniger, so isch das halt
Wird byym serwiere dr Kaffi kalt

«De froogsch Di wenn guet im rächne bisch
E drittel Fraue, e drittel Männer, was ächt s'letschte drittel isch»

Eerschte, zwaite, dritte Gang in mym Cabriolet
D'Sunne im Gsicht, d'Hoor im Wind, was willsch mee
Ych gniess das feeling – s'isch allerhand
Bis ych 50 Meeter wyter, wider an ere Baustell stand

www.tourischte.ch

Fasnacht 2014



Unser Bäffzgi-Läbe isch halt mänggmol kai Schlägg
wenn i emol s'Bainli lipf – rysse's mi an dr Laine ewägg
und s'Wybli do isch grad laifig – jetz isch ebbis los
und ab und zue setze mer halt e Hyffeli uff d'Strooss
denn mien mir wäg däne Mensche eifach numme lache
wenn's wäg jedem Schyssdrägg grad e Initiative mache.

Do letschi fahr ych in d'Stadt mit dr Frau
vo Baustell zu Baustell – und stand halt im Stau
woni wyterfahre will, macht mi Auti kai Wangg
no frogt sie, was isch los – und y sag kai Moscht me im Tangg
är do isch aifach guet und kunnt halt druss mit sym Kaare
also ych – wär do aifach jetz wyter gfahre.

Jetz hängge si nэгgschtsens, dr Fährimaa findets geil
si Fähri an sone Bantschi-Tschamping-Seil
bi Hochwasser wurd denn die Fähri esoo
nit nur quer – sondern e Stigg rhyabwärts goo
so ungfähr bis zer Dreyrosebrugg
und s'Glatte wär, dangg däm Seil – käm si ellei wieder zrugg.

E Schugger hett e Säxer im Lotto gha
denn hett er kindet und fyhlt sich als ryyche Maa
er hett Wärggzyg und drey Taschelampe kauft
är schmeggt s'grosse Gschäft wo im Momänt guet lauft
jetz kauft er no drey Räuber, dä isch nit ganz bache
und will sich als Schugger denn sälbstandig mache.

Das Handdäschli hett me bis in d'UNO diskutiert
denn hett mi das Däschli schampaar interessiert
woni's gsee ha in Ziiri – hett's sich's bewiiese
s'isch e lumpigs Wucherdäschli fir dryssig Riiese
wenn y bedängg – dass ych – do muesch grad lache
uss zwai Robidog-Seggli en ähnligs ka mache.

Ain vo Ziiri und aine vo Basel doo
hänn bi däne Sex-Boxe in Ziiri e Job bykoo
aber em Ziircher isch dä Job gar nit so gläge
dä muess drum deert putze und wische und fäge
aber em Basler gfallts – dä ka guet lache
är muess deert nämmlig go Stichprobe mache.

Im Verwaltigsgebäud vo dr BVB
deert hänn's jetz d' Lift ussbaut – si hänn kaini mee
no ha'ni am Schalter gfroggt, worum het's kaini Lift me doo
jo die bruche mr nimmi – s'Personal wird drum am Sail aabegloo
und d'Kunde dien die glatte Wänd uff wandere
und s'Kader fliegt – so Ain no em Andere.

Bim Yyskunnschtlauf gitt's Piruette – bim Ryttsport dr Oxer
bim Yyshockey gitts dr Bodycheck – dr Kinnhogge bim Boxer
bim Schwinge gitt's dr Brienzer – bim Schwimme dr Graul
bim Kunstturne d'Schruube – bim Fuessball gitt's s'Faul
und y ha gheert, dass die wo dr Schiii-Langlauf liebe
jetz die doppleti Merkel-Absagger-Schwalbe iebe.

D'Polizey hett so Alarm-Sireenli verschänggt
das isch aber nit nur fir Fraue dänggt
au e Maa isch vor Yberfäll und Gwalt nit gschitzt
do hätt scho'ne Mänggem das Sireenli gnitzt
ych sälber ha zwar jetze immer no kains
aber schyns haig dr Maa vo dr Hingis jetz ains.

Me waiss, die Junge hänn's zimmlig schweer
zem e gueti Stell z'finde – fir e Lehr
me sott halt druff achte was ain praktisch ka
und uff d'Fähigkaite luege bi some junge Maa
wenn zem Byspiel ain immer z'spoot kunt und sait y kumm gly
das kennt doch emol e guete Drämmelifiehrer sy
und wenn ain immer liegt und kasch em's nit iibel näh
das wurd doch en ideale Politiker gäh
und wenn'd aim immer 10 Mol musch riefe bis er reagiert
däm sott me empfähle, dass er Källner studiert
und wenn ain gärn in Luxus und Saus und Braus läbt
wär das sicher – dass das emol e Thai-Boxer gäbt.

Wäg däm Rossfleisch-Skandal, wo me do iberall verzellt
hani kirzlig innere Baiz e Haasepfäffer bstellt
no hani dr Baizer gfroggt – was isch das fir Fleisch
das isch Haas – aber au Ross hett's dinne – waisch
no froog ych, wieviill Ross hett's denn in däm Fraass
no sait dä Halb und Halb – also ai Ross uff ai Haas.

Mir Zwai sin rasserain, mit Stammbaum und so
me sait uns au Baschterli – aber do kenne mr driiber stoh
mir sage jo au Schwoobe und Näger, dasch Kultur
mr verzelle Eeschtryycher Witz, und sage no Mohrekopf ganz stur
und vo de Ziircher sage mr jetzt nyt, fir die gits e Huffe Nämme
und zue Eych do inne sage mr, blyybet suber und sali zämme.

baeffzgi@baeffzgi.ch

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch



Fasnacht 2014

Ersatzbangg



Dr Berlusconi griegt jetz doch no waichi Gnei
Im Geegesatz zue friener spricht me ihn nimm frei
Bestächig, Styyrbedruug und Liege
Frauehandel, Zaale biege
Das wär e Chef fir d Zircher-Sitte-Bolizei



Zwai Fans die zinde, zmittst im Match vom FCB
Petarde, Faggel, schwarzi Rauchtöpf und no mee
Dr Heusler maint ganz konschterniert
Jä sin denn die nit informiert
Lut Bundesgrichtsentschaid sin d Fümöir doch passé

1:12

Das isch kai Loonscheer, wo dä Helge zaige duet
Au als Frauequote passt s nit wirgglig guet
Dää Helge zaigt, dasch allerhand
S git z Basel-Stadt und Basel-Land
Zwelf Regierigsreet und ain nur nimmt dr Huet



Em Sauber Formel 1 – Team, sii das isch kai Witz
Fäält s an Gäld, grad zimmlig vyyl, nit nur e bitz
Me kunnt mit zaale nimme nooch
Es syyge d Keschte aifach z hooch
Bi jeed're Bobadilla-Teschtfahrt git s e Blitz



Wo unt'rem Stadiondach so ain vo Greenpeace hängt
Und an däm dinne Sail sich langsam aabe sänggt
Dänggt dr Muri kuurz und knapp
Hoffentlig stürzt dä nit ab
S glyyche Sail het bi dr Fääri au nit glängt



Wo d Frau Merkel zwische Meeting und Traktande
Mit de Langlauf-Ski e bitz abrupt duet lande
Rieft si bim Waarte uff dr Heli
Dasch e Drohne deert, verdelli
Dr Obama het mi Notruef falsch verstande



Uff sym E-Bike faart dr Morin wien e Sau
Duur d Tempo 30 Zoone – blitz! – scho git s Radau
Dr Schugger frogt «zaale si bar?»
Do maint dr Morin klipp und klar
«Zien si s vom Konto ab, so machts dr Conti au»



Noo nem Morin blitzt s grad nomol e baar mee
E VW-Golf, drei Fiat und e BMW
S wird jeede biesst, bis uff ai Maa
Deert het dr Schugger Mitlaid gha
«Du arme Siech, i ha di CoopBank-Konto gsee»



Z Lieschtel am Tunnelfescht bi Wysswyy, Kirsch und Häppli
Sait dr Max vo Maisprach mit sym roote Käßpli
Soo vyyl Gäld nur fir das Loch
Jä doo drgeee siige doch
Die fimf Lecher im Regierigsroot e Schnäßpli



Uff em Dach vom M-Paargg, sii das isch e Wucht
Het d Migros neierdings e aigni Laggsfisch-Zucht
Do het mir geschter aine gsait
Si baue jetz zer Sicherhait
Uff em Dach vom Joggeli e Haifisch-Bucht



Skandal in Basel



In Basel stoot e Waartehuus
Deert faart kai Drämmli yy und uus
Well denn, wenn i uff s Drämmli waart
Grad stundelang kains duurefaart

Doch niemer isch guet informiert
Well d Lyychtazaig nit funggtioniert
Uss dääre Technik wirdsch nit schlau
Im beschte Fall stoot deert nur «Stau»

Und dusse bi dr Schützematt
Stoosch dir bim Waarte d Flosse platt

Skandaaal – bi dr B V B
Skandaaal – bi dr B V B
Skandaaal – Skandal in Basel

Dr Chef dä het e Delifoon
Mit däm schiggt doch dä grossi Gloon
Dr Mitarbait're Rosi C.
So Bilder wo die nit will see

D Familie griegt die guete Boschte
S Gschäftsauto daarf eppis koschte
Bschisse wird, wo s numme goot
Im Kader und Verwaltigsroot

Dass s Drämmli immer suuber wär
Das wintscht sich unsre BVBär

Skandaaal – bi dr B V B
Skandaaal – bi dr B V B
Skandaaal – Skandal in Basel

In Basel stoot e Bankehuus
Deert geen schyyns d Yankee yy- und uus
Well uff däm Wääg – e jeedi Wett
Dr Fiskus kaini Chance het

Doch d Amis sin guet informiert
Dr Ghaimdienscht het scho observiert
S Konto 32 16 8
Het är die ganz Zyt iberwacht

Bald flutteret e Buess ins Huus
Das raubt em Banggscheff no dr Pfuus

Skandaaal – bi dr BKB
Skandaaal – bi dr BKB
Skandaaal – Skandal in Basel

In Basel stoot e scheens roots Huus
Deert goot d Regierig yy und uus
Damit s in dääre Stadt am Rhy
Genau so lauft, wie s sotti syy

Wo ain vo de Regierigsreet
Mit Schregg si Konto-Usszuug gseet
Merggt är – deert druff, es isch e Bracht
Herrscht Konjunggtuur all Daag und Nacht

Dr Conti sait e bitz verwürrt
Mit Bligg uff d Konti – s lauft wie gschmiirt

Skandal – bi dr CVP
Skandal – bi dr CVP
Skandal – Skandal um Conti

Skandal – Moral – Skandal – Moral
Skandal – Moral – Skandal – Moral
Skandal in Basel

Wottsch au by uns bänggle?

Schigg doch aifach e Brief in unser Boschtfach

VSG Postfach 4365, 4002 Basel

Oder goosch uff, www.vsg-basel.ch

